

Uwanda wa Maisha Matakatifu

Bali ninyi ni mzao mteule, ukuhani wa kifalme, taifa takatifu, watu wa milki ya Mungu, mpate kuzitangaza fadhili zake yeye aliyewaita mtoke gizani mkaingie katika nuru yake ya ajabu—**1 Petro 2:9.**

Kanisa la Kristo duniani li katikati ya giza la kimaadili la ulimwengu usio mwadilifu, ambao unaikanyaga sheria ya Yehova. Lakini Mkombozi wao, ambaye amelipa fidia yao kwa gharama ya damu Yake ya thamani, amefanya kila uwezekano ili kwamba kanisa Lake liwe mwili ulioong'oka, unaoangazwa na Nuru ya ulimwengu, likiwa na utukufu wa Imanueli. Miale angavu ya Jua la Haki, ikiangaza kupitia kanisa Lake, itakusanya katika zizi Lake kila kondoo waliopotea, waliotanga mbali ambao watakuja Kwake na kupata kimbilio Kwake. Watapata amani na nuru na furaha katika Yeye aliye amani na haki milele.

Washiriki wa kanisa mmoja mmoja wanapaswa kudumisha nuru ya upendo wa Mungu ikiwa inawaka kwa mng'ao angavu katika nafsi zao wenyewe, ili pia iweze kuangaza kwa wengine. Tuna mambo mengi sana yatakayokuwa hatarini ikiwa tutaruhusu ulegevu wa kiroho kutuandama. Tujihadhari dhidi ya kujishughulisha na chuki kwenye huduma za kidini na majukumu ya kidini. Hebu tupambane kwa uthabiti dhidi ya ule ulegevu wa nafsi ambao ni hatari sana kwa ukuaji na hata kwa maisha ya Ukristo. Kanisa hilo litakuwa na ustawi na ufanisi ambalo washiriki wake wanaweka bidii, juhudi binafsi kufanya mema kwa wengine, ili kuongoa roho. Hii itakuwa kichocheo cha mara kwa mara kwa kila kazi nzuri. Wakristo wa namna hii watafanya kazi kwa bidii zaidi ili kupata wokovu wao wenyewe. Nguvu zilizokuwa zimelala zitaamshwa, nafsi yote ikivutiwa na azimio lisiloshindwa ili kupokea pongezi ya Mwokozi ya "Vema sana," na kuvaa taji ya mshindi.

Yesu hulifanya kanisa Lake kuwa hekalu takatifu kwa ajili ya Mungu. Anatangaza, "Kwa kuwa walipo wawili watatu wamekusanyika kwa jina langu, nami nipo papo hapo katikati yao," Mathayo 18:20. Kanisa Lake uwanda wa maisha matakatifu, lilijaliwa kuwa na karama tofauti tofauti na kujaliwa na Roho Mtakatifu. Majukumu yanayofaa yametolewa na Mbingu kwa kila mshiriki wa kanisa duniani, na wote wanapaswa kupata furaha yao katika furaha ya wale wanaowasaidia na kuwabariki.